

Samningur

mennta- og menningarmálaráðuneytis

við Akureyrarbæ

um ráðstöfun rekstrarframlags

Mennta- og menningarmálaráðuneyti, kt. 460269-2969, í samningi þessum nefnt ráðuneyti, og Akureyrarbær, kt. 410169-6229, gera með sér svofelldan samning.

1. Markmið, verkefni og starfsemi

1.1. Meginmarkmið með samningi þessum eru:

- Efla hlutverk Akureyrar í lista- og menningarlífi á Íslandi.
- Með stuðningi ríkisins við atvinnustofnanir á sviði leiklistar, myndlistar og tónlistar er Akureyri eflað sem þungamiðja öflugs menningarstarfs utan höfuðborgarsvæðisins og atvinnumennsku á sviði lista.
- Styrkja þá innviði sem felast í öflugum menningarstarfi og fjölbreyttum menningarkostum fyrir íbúa og listafólk. Ríki og bær leggja þannig sín lóð á þær vogarskálar að efla búsetukosti á Norður- og Austurlandi.
- Tryggja framgang stefnu málefnasviðs 18 innan lista og safnamála.

1.2. Stuðningur ríkisins beinist að eftirtöldum meginverkefnum samningsins:

- Starfsemi atvinnuleikhúss undir merkjum Leikfélags Akureyrar.
- Starfsemi sinfóníuhljómsveitar undir merkjum Sinfóníuhljómsveitar Norðurlands.
- Efla Menningarhúsið Hof sem vettvang sviðslista og tónlistar.
- Starfsemi Listasafnsins á Akureyri.

1.3. Starfsemi

- Í samræmi við árlegt stefnuskjal sem Akureyrarbær vinnur, sbr. gr. 5.2. skal starfsemi starfsemin taka mið af þeim markmiðum og áföngum sem í því skjali eru tilgreindir.

1.4. Áherslur

- Akureyrarbær taki mið af menningarstefnu stjórnvalda og gildandi fjármálaáætlun hverju sinni.

2. Forsendur samnings, lagaheimildir og lagaskyldur

- 2.1. Samningur þessi er gerður með fyrirvara um samþykki fjármála- og efnahagsráðherra skv. 1. mgr. 40. gr. laga nr. 123/2015 um opinber fjármál.
- 2.2. Ráðuneytið gerir samning þennan á grundvelli heimildar í 40. gr. laga um opinber fjármál nr. 123/2015.

- 2.3. Ráðuneytið annast samskipti aðila vegna samningsins við fjármála- og efnahagsráðuneyti, sbr. 1. mgr. 21. gr. laga nr. 123/2015 um opinber fjármál, og við Alþingi.
- 2.4. Framlag í samningi þessum fellur undir stefnu ráðherra á málefnasviði 18 menning, listir, íþróttir og æskulýðsmál, málaflokk 18.2, menningarstofnanir sbr. 20. gr. laga um opinber fjármál nr. 123/2015.
- 2.5. Akureyrarbær skal hafa kynnt sér lög og reglugerðir sem gilda um verkefnið og skuldbindur sig til að starfa samkvæmt þeim. Vakin er sérstök athygli samningshafa á eftirfarandi lagaákvæðum: leiklistarlög nr. 138/1998, myndlistarlög nr. 64/2012, lög um tímabundnar endurgreiðslur vegna hljóðritunar á tónlist nr. 110/2016, lög um ríkisendurskoðanda og endurskoðun ríkisreikninga, nr. 46/2016 og lög um opinber fjármál nr. 123/2015.

3. Fjárhagsleg skuldbinding ráðuneytisins

- 3.1. Heildarskuldbinding samningsins er 599.747.000 kr. á samningstímanum.
- 3.2. Framlag ráðuneytisins er 195.000.000 kr. árið 2018. Framlagið hækkar árið 2019 og verður 199.875.000 kr. og árið 2020 verður framlagið 204.872.000 kr.
- 3.3. Verði gerð breyting á fjárheimildum til málaflokks 18.2 menningarstofnanir í fjárlögum geta aðilar tekið upp viðræður um aðlögun rekstrarins að breyttri fjárveitingu.
- 3.4. Gerður er fyrirvari um að stjórnvöld kunna að ákveða aðhaldsaðgerðir við samþykkt fjárlaga og á Akureyrarbær ekki kröfu á ríkissjóð eða rétt á bótum þótt framlag til samningsins verði lækkað eða fellt niður. Séu gerðar almennar aðhaldskröfur af hálfu ríkisins til málaflokks 18.2 er heimilt að gera sömu kröfur til aðhalds í rekstri verkefna sambærilegum og falla undir málefnaflokk 18.2 hjá Akureyrarbæ.
- 3.5. Fjárhagsleg ábyrgð ríkisins vegna rekstrarverkefnisins takmarkast við þær fjárhæðir sem eru í samningnum.
- 3.6. Árlegt framlag verður greitt í tólf jöfnum hlutum fyrsta dag hvers mánaðar. Greitt verður inn á bankareikning í viðskiptabanka Akureyrarbæjar enda uppfyllir samningshafi öll skilyrði og kröfur sem samningur þessi kveður á um.

4. Ábyrgð

- 4.1. Framlög Akureyrarbæjar nema í heildina ekki lægri fjárhæð en framlag ríkissjóðs á hverju ári.
- 4.2. Akureyrarbær rekur Listasafnið á Akureyri og gerir árlega fjárhags- og starfsáætlun fyrir safnið þar sem tilgreind eru markmið verkefna og hvaða mælikvarðar verði lagðir til grundvallar þegar árangur þeirra verður metin.
- 4.3. Akureyrarbær er heimilt að gera samning við sjálfseignarfélagið Menningarfélag Akureyrar ses. (MAk) um starfsemi Leikfélags Akureyrar og Sinfóníuhljómsveitar Norðurlands.
- 4.4. Akureyrarbær skal tryggja að aðilar samkvæmt 4.3. beri ábyrgð á skuldbindingum sem stofnað er til í tengslum við samning þennan.
- 4.5. Akureyrarbær er óheimilt að:
 - 4.5.1. Afhenda, án skriflegs samþykkis ráðuneytisins, réttindi sín og skyldur skv. samningi þessum í hendur þriðja aðila.
 - 4.5.2. Framselja greiðslur til þriðja aðila og setja með öðrum hætti til tryggingar fjárskuldbindingu skv. 45. gr. laga um samningsveð nr. 75/1997.

5. Upplýsingar, samskipti og eftirlit vegna fjármála og verkefna

- 5.1. Ráðuneytið hefur eftirlit með framkvæmd samningsins.

- 5.2. Akureyrarbær skal skila ráðuneytinu árlega stefnuskjali til þriggja ára sbr. gr. 31. í lögum nr. 123/2015 um opinber fjármál. Í stefnuskjalinu skal koma fram helstu markmið og aðgerðir Akureyrarbæjar. Stefnuskjalið skal taka mið af stefnu ráðherra fyrir málaflokk 18.2 sem birtist í fjármálaáætlun til næstu fimm ára og greinargerð málefnasviðs 18 sem birtist í fjárlagafrumvarpi hvers árs. Stefnuskjalið er viðhengi við samning þennan.
- 5.3. Akureyrarbær skal skila ráðuneytinu ársáætlun um rekstur og starfsáætlun yfirstandandi árs, sbr. gr. 1.3. þar sem fram komi m.a. áætlun um ráðstöfun framlagsins og helstu markmið sem unnið verður að fyrir lok hvers árs. Einnig skilar Akureyrarbær upplýsingum um ný verkefni eða breytingar sem kunna að verða á rekstrinum.
- 5.4. Akureyrarbær skal skila ráðuneytinu endurskoðuðum ársreikningi ársins á undan með skýringum fyrir lok júní ár hvert og skal afrit jafnframt sent Ríkisendurskoðun.
- 5.5. Fulltrúar ráðuneytisins og Akureyrarbæjar funda að lágmarki árlega um samninginn og framkvæmd hans. Fyrir lok nóvember skilar Akureyrarbær ráðuneytinu greinargerð um framkvæmd samningsins þar sem fram komi m.a. staða verkefna og hvernig framlagi var ráðstafað miðað við áætlun. Einnig skal gera grein fyrir mælikvörðum og viðmiðum sem lögð eru til grundvallar árangri á verkefninu sbr. stefnuskjal sbr. gr. 5.2.
- 5.6. Akureyrarbær skilar ráðuneytinu öllum þeim upplýsingum sem ráðuneytið kallar eftir, í tengslum við reksturinn til opinberrar upplýsingagjafar.
- 5.7. Akureyrarbær veitir ráðuneytinu upplýsingar sem það kallar eftir vegna eftirlits með framkvæmd samningsins. Ráðuneytið hefur heimild til að gera sjálft eða fela öðrum að gera athuganir og úttektir á öllum eða einstaka þáttum í framkvæmd samningsins. Við eftirlit hefur ráðuneytið óheftan aðgang að öllum gögnum sem máli skipta.
- 5.8. Samning þennan, ársreikning, sbr. grein 5.4., og greinargerð um framkvæmd samnings, sbr. grein 5.5., skal birta á vef Akureyrarbæjar jafnóðum og gögn liggja fyrir. Ráðuneytinu er heimilt að birta gögnin á vef sínum.

6. Vanefndir og meðferð ágreinings

- 6.1. Akureyrarbær tilkynnir ráðuneytinu tafarlaust ef það telur vafa leika á að það geti uppfyllt skyldur samkvæmt samningnum. Jafnframt greinir frá úrræðum sem það hyggst grípa til.
- 6.2. Ráðuneytinu er heimilt að fresta, draga úr eða stöðva og endurkrefja greiðslur uppfylli Akureyrarbær ekki skyldur sínar samkvæmt samningi þessum.
- 6.3. Samningsaðilar skulu leitast við að jafna ágreining, ef einhver er, sín á milli.
- 6.4. Dómsmál sem rísa kann út af samningi þessum skal rekið fyrir Héraðsdómi Reykjavíkur.

7. Gildistími og lok samnings

- 7.1. Samningurinn gildir frá 1. janúar 2018 til 31. desember 2020.
- 7.2. Hvor aðili um sig getur óskað eftir því að einstök ákvæði samnings þessa eða samningurinn í heild verði tekinn til endurskoðunar, enda séu færð fyrir því efnisleg rök. Endurskoðun skal þá hefjast svo fljótt sem verða má.
- 7.3. Óski annar hvor aðila eftir að segja samningnum upp skal það gert skriflega með þriggja mánaða fyrirvara.
- 7.4. Samningur þessi er gerður í þremur samhljóða eintökum og heldur hvor samningsaðili eintaki auk þessa sem fjármála- og efnahagsráðuneyti heldur eintaki.

14. maí 2018

Lilja D. Alfreðsdóttir
mennta- og menningarmálaráðherra

Eiríkur Björn Björgvinsson
bæjarstjóri Akureyrarbæjar

Samþykki veitt, sbr. 1. mgr. 40. gr. laga nr. 123/2015.

f.h. fjármála- og efnahagsráðherra